

Apan sa dihang mag-ampo ka . . .

WWW.TENDAYSOFPRAAYER.ORG

ADLAW 6—MOABOT ANG IMONG GINGHARIAN

“Ang gingharian sa Dios anaa sa sulod ninyo” (Lucas 17:21b, NKJV).

Nahiabut na ang Kaluwasan

Sa Lucas 19 mitanyag si Jesus nga mosulod sa balay ni Zaqueo. Unya si Jesus miingon, “Karong adlaw ang kaluwasan miabot niining balaya” (bersikulo 9). Sa diha nga si Jesus magpuyo sa imong dapit, ang langit anaa diha. Ug sa dili ka pa makasulod sa gingharian sa Dios, ang gingharian sa Dios kinahanglan mosulod sa imong kasingkasing. Sa Juan 17 si Jesus wala mag-ampo nga ang Iyang mga sumusunod mahimulag sa pisikal gikan sa kalibutan apan nga sila dili ma-iyas sa kalibutan (Juan 17:15, 16).

Kinahanglan nga maanad na kita nga magpuyo dinhi sama sa atong pagpuyo sa langit. Kon kita motutok sa mga butang sa kalibutan, kita mahisama sa kalibutan. “Kon asa gani ang imong bahandi, atua usab didto ang imong kasingkasing” (Mat. 6:21, NKJV). Apan kon kita motutok sa Dios ug sa Iyang gingharian, ang Iyang gingharian molihok dinhi kanato. “Ang mga dagway sa mga lalaki ug mga babaye nga nakigsulti sa Diyos, kang kinsa ang dili-makita nga kalibotan tinuod, nagpahayag sa kalinaw sa Diyos. Ilang gidala uban kanila ang malumo ug mahigalaon nga kahimtang sa langit” (*Medical Ministry*, p. 252).

Sa usa sa akong pag-ebanghelyo sa Cuba, daghang bata ug ilang mga ginikanan ang miadto aron maminaw. Akong nasayran gikan sa pastor nga kining tanang bisita mianhi tungod sa usa ka babaye. Gipangutana nako siya kung unsa ang iyang gisulti aron sila moadto. Siya mitubag, “Dili kana tungod sa akong gisulti kanila,” ug dayon iyang gidapit kami sa pagduaw kaniya pagkasunod adlaw ug sa pakigsusi. So nangadto mi.

Gamay ang iyang balay, sama lang kini ug butanganan sa mga gamit. Walay mga gamit sa sulod gawas sa duha ka higdaanan, gamay nga lamesa, duha ka gagmay nga mga lingkuranan, ug usa ka camping stove. Sayo sa hapon mogawas siya atubangan sa iyang balay. Ug unya miabut sila—halos duha ka gatos ka bata! Gipalingkod niya sila ug gipakita kaniya ang papel nga gipirmahan sa ilang mga ginikanan. Naglinya ang mga bata ug gihatagan niya silang tanan og bugas. Nanglingkod sila ug nangaon.

Samtang sila nangaon, siya mipasabut kanamo nga kadaghanan sa iyang mga silingan walay trabaho, apan siya napanalanginan nga adunay trabaho. Dili paigo ang iyang suweldo aron makapalit og lain-laing pagkaon, apan makapalit siya og bugas. Ug unya miingon siya, “Gitawag kita aron mahisama kang Jesus, aron ipakita kung unsa ang gingharian sa Dios aron tinguhaon kini sa mga tawo. Atong gamiton ang pamaagi ni Jesus. Aron sa pagpakaon ug pakighigala kanila. Kon ako magkinabuhi alang sa akong kaugalingon, sa unsang paagi ako mahisama kang Jesus? Ug kung hatagan ko lang ang mga tawo og pisikal nga tinapay, sa unsang paagi kini makatabang kanila? Mao nga naggamit ako og bugas aron ipakita ang gugma sa mga bata. Unya gihatagan ko usab sila ug espirituhanong pagkaon. Apan usahay

malinga ang mga bata. Aron masiguro nga ang mga bata maminaw, kinahanglan silang mopauli ug, isip pamatuod nga sila namati, isulti sa ilang mga ginikanan ang istorya ug ang kanta nga ilang nakat-unan karon. Niining paagiha makab-ot usab nako ang mga ginikanan. Karon nga dugay na nakong gibuhay kini, ila kong gihigugma, gisaligan, ug andam sila maminaw.”

Sa dihang nahuman na ang mga bata og kaon, nagsugod siya sa pagtudlo kanila mahitungod ni Jonas ug dayon mitudlo kanila og kanta. Pagkahuman, gigakos nila siya ug gipasalamatan. Nadungog ko sila nga nag-ingon, “Gihigugma ka namo, Tiya!” Dako siyag ngisi sa iyang nawong. Siya miingon, “Dili lang kay naningkamot ko nga ipakita kanila ang gingharian sa Diyos, kondili gipanalanginan usab nila ako ug gipuno sa kalipay. Ang mas dakong kalipay mao ang makita sila nga mosimba ug mag-ampo ug magkat-on bahin sa Diyos. Apan ang akong labing dakong kalipay mao nga makita ko sila sa langit. Busa gusto ko nga makatilaw sila og gamay nga tinulo sa langit karon.”

Si Hesus hapit na moabot! Apan aron maandam ka sa pagsulod sa Iyang gingharian inig-abot na Niya, kinahanglan nga anaa na kanimo ang Iyang gingharian karon. Kinahanglan ka nga mag-ampo adlaw-adlaw, “Ginoo, palihug sulod uban sa Imong gingharian sa akong kasingkasing karong adlaw.” Ang Dios nagtawag kanimo sa paghimo sa Iyang gingharian nga tinuod karon. Pinaagi sa adlaw-adlaw nga pag-ampo, pagtuon sa Pulong, ug malipayong pag-alagad, pagkinabuhi dinhi sama sa imong pagkinabuhi sa langit. Himoa nga ang langit mopuyo diha kanimo. Mahimong kang kamot sa Dios dinhi, sama nga ang mga tawo sa pagtoo mao ang Iyang mga kamot kaniadto.

Gusto sa Dios nga ibutang ang Iyang gingharian sa imong kasingkasing ug panimalay karon ug matag adlaw. Gusto Niya nga maanad ka sa pagpuyo sa Iyang presensya isip mga lungsoranon sa langit. Adlaw-adlaw dapita ang langit diha sa imong kasingkasing ug pasagdi ang Iyang gugma nga modagayday ngadto sa uban pinaagi sa imong mga lihok.

Magdungan ta sa pag-ampo.

Oras sa Pag-ampo (30–45 Minutos)

Ang tanan nga mga grupo sa pag-ampo adunay lainlaing mga paagi sa hiniusa nga pag-ampo. Kami nag-awhag kaninyo sa paggugol sa sunod nga 30-45 minutos sa hiniusang pag-ampo, sa bisan unsa nga paagi nga ang Balaang Espiritu mogiya. Among giawhag ang mugbo lang nga mga pag-ampo (1-3 ka linya). Makahimo kini sa ubay-ubay nga mga tawo sa pag-ampo sa makadaghan nga higayon. Anaa sa ubos ang pipila ka mga pananglitan sa pag-ampo pinaagi sa Kasulatan base sa tema. Mahimo kang mag-ampo pinaagi sa ubang mga teksto ug ilakip ang ubang mga butang sa imong oras sa pag-ampo. Tan-awa ang Giya sa Lider ug World Church Prayer Requests alang sa mga ideya sa pag-ampo.

Pag-ampo sa Pulong sa Diyos — Lucas 17:21b

“Ang gingharian sa Dios anaa sa sulod nimo.”

"Ang gingharian sa Diyos"

Ginoo, nasayod kami nga ang imong gingharian dili bahin sa kalibotanong gahom o puwersa. Hatagi kami ug kaalam aron masabtan ug ikinabuhi ang Imong mapaubsanong gingharian karon. Ipahiangay kami sa pag-alagad, paghupay, ug pagdasig sa Imong yutan-ong mga anak.

"Naa sa sulod nimo"

Ginoo, tabangi kami nga magkinabuhi sama sa mga lungsoranon sa langit sugod karong adlaw. Ilingi ang among mga mata gikan sa among kaugalingon ngadto sa uban. Kinsa nga tawo sa atong palibut ang kinahanglan nga maminaw karon? Kinsa ang nagkinahanglan og mainit nga pagkaon o saput alang sa ilang mga anak? Kinsa ang kinahanglang makadungog sa atong testimonya mahitungod sa makapausab nga gahum ni Jesus? Isulti sa among mga kasingkasing ug itanom ang Imong gingharian sa among kinabuhi karon.

Dugang nga mga Sugyot sa Pag-ampo

Pagpasalamat ug Pagdayeg: Pagpasalamat alang sa usa ka panalangin ug pagdayeg sa Dios tungod sa Iyang kaayo.

Pagsugid: Paggahin ug pipila ka minuto alang sa pribado nga pagsugid ug pagpasalamat sa Dios sa Iyang pagpasaylo.

Giya: Hangyos ang Dios sa paghatag ug kaalam alang sa kasamtangan nga mga hagit ug mga desisyon.

Atong Simbahan: Pag-ampo alang sa rehiyonal ug tibuok kalibutan nga mga panginahanglan sa simbahan (tan-awa ang separado nga papel nga adunay mga hangyo).

Lokal nga mga Hangyo: Pag-ampo alang sa kasamtangan nga mga panginahanglan sa mga miyembro sa simbahan, pamilya, ug mga silingan.

Pamati ug Pagtubag: Paggahin ug panahon sa pagpamati sa tingog sa Dios ug pagtubag sa pagdayeg o awit.

Mga Sugyot sa Awit

SDA Hymnal: Live Out Thy Life Within Me (#316); He Lives (#251); So Send I You (#578)

Other Songs: We Are His Hands; Brighten the Corner, This Little Light of Mine